

滎陽外史集

總校官降調編修臣倉聖脉

校對官編修臣張燾

膳錄監生臣吳岐山

欽定四庫全書

榮陽外史集卷四十六

明鄭真撰

傳

遂初老人傳

遂初老人姓王氏名厚孫字叔載王為瑯琊著姓其先在宋居開封祥符高祖保信軍承宣使安道扈從南渡始家于鄆曾祖撫吏部郎中崇政殿說書祖應麟號厚

齋先生中寶祐博學宏詞科歷事三朝典誥冊命皆出其手官翰林學士禮部尚書父昌世承務郎世稱為承奉公老人生於元大德庚子十二月一日距今明洪武之壬子年七十有三謂人曰天地生人之初吾不得而知也可知者理而已理之在人初何嘗不善克遂其初足矣吾幸以世家子持身律已實拳拳焉今耄矣其庶幾乎迺自號遂初老人云老人在幼知學八歲詩成四韻讀書日記數百言十歲已竟論孟詩書禮記皆成誦

并閱尚書深寧集習書義兼詞賦操筆立就鄉先生王
僉判叔蘇趙太社孟何戴教授表元聞其異就見焉科
制行改治詩經蓋東南詩學以明郡首稱舒文靖璘傳
李國博元白王於舒李世親具得其源委時四方承平
文物殷盛承奉公守先訓弗仕登門皆老成博雅老人
日侍左右面命心傳充積溥洽由是熟於性理治道禮
樂法制及臺閣職官典故世胄譜牒鄉里欲言其祖者
多咨問之表文清公桷受業尚書後自翰林歸里第輒

問所學老人對曰近於濂洛關輔建安西蜀諸書稍已
通習惟讀書記衍義正宗意有所得以其明潔整密有
成法易知而可守也因言世之學者涉獵朱子如干卷
書自謂得其真傳且譏議淳熙諸老不知諸老與朱子
同時言論雖不盡合而博聞實踐為朱子推許今人耳
目所不及迺藉口性理以自文其寡陋高談濶視漸成
虛誕之風先生達尊宜懲其弊以新士習文清著四明
志命老人分撰二考且言子家世太史亦究意否老人

曰經與史同出而異名古有編年司馬氏為紀傳隋志
始稱正史非古也作史必曰三長年代協體統之會人
物萃品類之歸叙事由顛至末不為詳修辭以一當十
不為簡彼謏聞臆見雜見衆手舛訛遺漏欲以傳信久
遠難矣因舉累代高下得失甚備文清為屬耳復閱其
郡庠試中程文閫府表稿作而嘆曰先師之道茲不墜
矣門下老客得見繼祖之盛何幸哉金華黃文憲公潛
嘗三至鄞其曾祖朝請夢炎視吏部為座主謂叔載余

兄弟行假宿細論因為誌承奉公墓也其始也躬草剡
薦為郡學訓導而帥府都事曹愚僉憲孫揖郡守郭侑
同為勸引老人累辭不獲至則開說名理辨析疑難請
業者頃刻數十篇諸生皆悅服老人既以師法傳庠序
嗣後二十餘年蠡吾王元恭鴻吉哩氏安圖公相望來
守親詣門屈致之前後與同列者程先生端禮鄭先生
奕夫胡先生世佐應先生奎翁皆氣類訢合座以下材
藝稱者世有其人朔望講義往時就章立題率一篇而

止老人病其拘取四書五經闢世教者質以已意為之
直說抑揚反覆音吐洪暢聞者竦服老人三試剡聞不
偶嘆曰得失有命苦心求售奚益用詞學十二體為古
文根柢三代兩漢博以唐宋諸名家屬詞平順絕去雕
巧富人奉禮幣招為師力辭不就陵陽年應復都司剡
東論年家契力招致教其子屈行輩敬憚之台彥博侍
憲副曹某來慮因謂叔載文行宜為學官憲副即署郡
直學老人以不任煩瑣辭年都司曰先儒謂錢穀亦為

已之學聖人辭尊居卑乃就職與吏輩不合拂衣去李
僉憲綱強起之塗田在鄞砂岸在昌岸在昌國為豪民
侵奪力陳其事皆得復廩粟有贏例歸職掌老人獨輸
於公會大修廟學請于郡守俾通吏事廉幹者司之遂
得與諸儒專論名教事教授陳先生廷言始與定交秩
滿授象山教諭尚書富于著述王海最為詳洽然未脫
藁失而復得多闕誤老人考訂編次請帥府鋟梓并他
書十二種以傳袁文清所撰四明志或有讒於僉憲沙

木斯鼎毀其板老人白之王太守元恭曰袁公中朝名
臣書法高古不可毀也太守持書以進僉憲驚悔命與
舊志並行屬老人成績志若干卷四明自宋紹興間有
鄉飲酒禮其後寢廢歲首僅序拜于學程先生請王太
守復其禮屬老人與鄭先生某考訂一遵儀禮用賓興
歲行之搢紳韋布周旋者每千餘人經費田為吉祥寺
僧所據老人與鄭先生白諸有司僧乃市負郭田歸我
歲積粟餘置庄一所象山學久失教養老人設主善為

文會以興士習租粟數百石每患逋負迺精加考覈倉
廩充足欲漁取者志不敢逞蔣景武中鄉選送宴津遣
慨然當之以郡檄歸校玉海諸書調婺州浦江教授甫
逾閱月即解官歸養母楊氏無祿仕意適朝廷遣大臣
李國鳳經略江南以便宜用遺逸既至鄞有司以老人
名上李曰此危太朴所深敬者署衢州儒學教授而中
書復用薦者除邵武路教授福建分省又陞為副提舉
皆不赴惟期內外無媿以待歸全而已老人天性質直

尤清苦介特日用服食隨其所有娶史氏系出相門有
賢行盡斥其粧具為公家費承順父母惟意所與疾則
盡心調治藥必親製煎煮至愈乃已在弟姪子孫皆然
姑適史萬卿貧歸養之嫁其女而葬其夫從兄震祖死
其子在他方棺殮葬之士友蔣宗簡以死托率先勸財
葬以禮求鴻文以誌妹適楊氏以疾歸母家調治八年
而卒一子侃早孤撫教成人侃亦篤於舅奉祭祀保墳
墓凜如不勝親故相依館穀之或以匱告假貸不吝弗

償亦不問患難救禦猶已事有過則面折無隱品別人
之賢否不以勢位高下為輕重不以待遇厚薄為是非
送死厚于奉生恤小篤于事大報德重于念惡勇退急
于趨進或有侵其產業恃強凌辱設計傾危造謗損譽
者則曰犯而不校其重義輕利處常順變多此類晚年
詩酒娛樂客至談宋季事疊疊不倦且及至正史官詮
次弗當欲為釐正尤極論奉化陳桎續通鑑前後之失
所著多名言有遂初藁三十卷嘗戒其子陞與隲曰承

家不在名利而在于不失身敬身不在外貌表襮而在于毋自欺讀書當貫古今處世必審進退其有同流合汙以為通矯時干譽以為高患得患失以終其身者此吾所深戒亦非所望于爾等也嗚呼敬之哉二子奉教不敢失墜老人有弟名寧孫通春秋詩二經先世手澤悉能記誦其亡也遺命與老人葬同兆域友于之誼蓋始終弗忘者寧孫無子隲為後云

滎陽生鄭真曰伏觀前代儒學之盛莫過於宋東萊呂

氏先生西山真先生雖以宏博顯實廣道學之傳厚齋
尚書於二先生沂流承源故於性理制度文章實兼諸
子之長世之論四明之學者徒知祖陸氏而宗袁楊而
不知言紫陽朱夫子之學者實始於尚書也尚書既歿
遺書舊藁老人既服膺弗忘而又師友遺老名儒其言
其行實足以膺黼黻謀猷之任然以心處退讓終不克
大其設施惜哉世運推移丘園肥遯而老成典刑藹然
為鄉邦後學模範有以學問之無窮命分之素定精思